

Anns an Lios thar Struth Chedroin,
 Ged bha dheuchainn thar luaigh,
 Bruchdadh'mach ged bha f hallas,
 Anns an teannuchadh chruidh;
 Bras mar bhraon-bhoinnean fala,
 Sios gu talamh mu chuairt,
 Ann a morachd a ghaisge,
 Sheas is ghleachd e gu buaidh !

Chaidh e codhail gach baoghal,
 Chum gu'n saoradh e chlann,
 B'ann nan aite chaidh ghlacadh,
 Leis a Cheartas cho teann;
 Bha e'n urras ar fiachan,
 Gheall e'n dioladh gu'n ceann:
 Cha robh mionaid a dhail dha,
 'N uair a thainig an t-am !

Ghlac a naimdean gun strith e,
 (Na bha dhith orr' 'san am)
 Shuidh an comhairl' gu dhiteadh;
 Mar nach b' Fhirean bhiodh ann:
 Dha an cuirt a luchd casgairt,
 Cha robh fasgadh no daimh;
 Ged bha 'm fianuisean breige,
 Fad o cheile nan cainnt.

'S ann a bhuail iad mar aon air,
 Nimh is faobhar an teang',
 'N deigh a cholunn a rusgadh,
 Chaidh a sgiursadh fuidh 'n laimh;
 Trusgan ruadh chuir iad uime,
 'S crun do sgithich mu cheann!
 O'n robh 'n fhuil air a thrusgan,
 Nuas na sruthan neo-ghann !